



EDITORIAL

Pa: Jossy M. Mansur

Natalee y un eror mas di Nel Oduber!

Ta masha facil pa, como Prome Ministro, tene un conferencia di prensa pa introduci un Comision cu ta bay "drecha tur loke ta ser bisa malo di Aruba" pa e medionan di comunicacion Americano cu ta riba nos isla pa investiga e berdad entorno e desaparicion di un ciudadano Americano. Esaki ta un demostracion mas di con aleha Nel ta di e realidad di loke ta pasando den e caso di Natalee.

Pakico awor, cu nos cu ta tribi di enfrente e camaranan di e televisionnan Americano pa duna opinionnan obhetivo riba loke ta sosodiendo cu e caso, di repente a bira "Arubianonan balente" (den e mesun tono sarcastico cu Nel sa usa pa revela su frustracion)? Nel kier mi opinion personal tocante e "Comision" ey? E personahenan cu ta forme ta, den mi buki, hendenan corecto, di conductanan admirable dentro di nos comunidad, pero ni individualmente ni conhuntamente ta bay por coregi nada di loke ta ser papia malo di Aruba. Ta e Americanonan mes, biba na Merca, amigonan incondicional di nos isla, ta e miher defensa cu Aruba a haya contra e malconcepcion cu a ser expresa contra Aruba. No ta e medionan di comunicacion actualmente na Aruba a haci tal cos, sino algun comentarista na Merca! Por lo menos siña reconoce e diferencia y actua di acuerdo!

E medionan cu ta na Aruba, danki na e intervencionnan di e abogadonan Arubiano cu a splica nos Leynan, cu tur nan defectonan, danki na nos cu ta tribi di muestra cara pa gana nan confianza (no ta nada facil contesta preguntanan cu bo sa ta ser mira pa mas o menos 20 milyon di hende!), a evita cosnan hopi peor! Ta e honestidad demostra pa nos tur cu a participa como observadorman den e caso misterioso aki a evita cosnan hopi peor pa nos isla!

Y e pregunta logico cu ta sigui ta: Pakico Nel no ta aparece na nos lugar pa duna e aclaracionnan cu ta bin al caso? Gustosamente mi ta cede mi intervencionnan na dje, pasobra e compromisonan contrai cu nan a kibra mi rutina di trabao y tin mi demasiado ocupa. Ta Nel y nos Ministro di Husticia mester ta riba e pantayanan di television tur dia, pa aclarea cosnan straño cu ta pasando den e caso y papia e berdad cu nan! Tur loke mi a tende te awor ta atakenan infunda contra e mucha muher mes (e victima) y nada contra e mucha homber cu ta e sospechoso principal, y su tata.

Nel ta corda e caso di e marinier cu a dal un señora Arubiano den su cara pa motibo di un choke, y con su yiu chikito a sali pa defende su mama y tambe a haya su boca kibra pa e marinier ey? Kico Nel ta kere a pasa cune despues cu nan a pone den un avion y mande Hulanda? El a haya castigo?

Nel a existi di e Ministerio di Defensa di Hulanda pa duna splicacion riba esey? E dos personanan ey tabata o no tabata Arubiano? Y Nel ta corda tambe e otro Hulandes Europeo cu nan a permiti pa bay Venezuela trankilamente mientras cu e tabata un procesado pa nos Leynan y no por a bandona nos isla? Esakinan ta djis un par di ehemplo pa mi yega na e pregunta cardinal: supone cu Joran tabata un Arubiano, con lihe Nel ta pensa cu e caso aki lo a ser resolvi y cuanto castigo inmediato e lo a haya?

Ta esey ta precisamente mi temor mas grandi, cu como Joran ta un mucha Hulandes-Europeo, y su tata ta un Huez Hulandes-Europeo, e caso aki por bay caba den e fondo di un weya di aroz cu coco! Ta e impresion ey nos mester percura pa no haya bida, pasobra e ora ey si nos a literalmente "coy awa"! E ora ey si nan ta bay baha riba nos manera zamuro! Y cu tur nan razon!

Mi no tin ningun idea si Joran y su amigonan a comete algun crimen; si acaso ta asina, mi no sa con involvi Paul por ta, pasobra ningun di nos tin acceso na e berdad, ya cu e tres mashinnan ey programa pa gaña no a papia e berdad te awor! Y dia cu nan papie mes, ta ken ta bay kere nan?

Nel, keremi: nos tur dos ta Arubiano y ta stima e isla aki y lo haci kico cu ta den nos poder pa protegi di inhusticia. Pero, e labor ey mester cuminsa na cas! Ta lamentable cu e caso aki mester a sosode pa habri hopi hende nan wowonan pa loke ta e di dos cara di Aruba, esun cu ta cuminsa 10'or di anochi. Y ta kendenan a haci nos mas consciente ainda di e bida nocturno ey? E prensa Americano cu ta na Aruba, un prensa hopi agresivo, cu ta coba den tur skina pa haya sa e berdad, y a pone nan dedenan riba un yaga cu hopi di nos ni sikiera tabata conoce den tur su extension.

E pregunta grandi ta awor: despues cu e caso di Natalee caba, cua corectivonan Gobierno ta bay introduci pa mengua o reduci te un minimo loke ta mordiendo e basenan di conducta aceptable den nos comunidad? Ta riba esey Nel mester instrui e Comision ey pa traha, y laga e defensa di nos isla den man di e Americanonan mes cu conoce nos Pueblo y nos isla, y ta dispuesto di duna nan opinionnan abiertamente, loke a sosode caba y lo sigui sosode. Ta toca nos djis suministra Pueblo Americano cu e berdad, individualmente o via e canalnan di ATA y AHATA, no cu excusanan fofo inventa djis pa defende nos industria turistico! Ta e bida di un mucha muher hoben ta ocupa nos awor, pa nos haya sa kico a pasa cune, no e consecucionan riba nos economia pasobra e no ta bay tin ningun efecto inmediato ni serio riba dje.